

Siunnersuummut oqaaseqaatit

## Oqaaseqaatit nalinginnaasut

### 1. Aallaqqaasiut

Ulloq 1. januar 2024-mi utoqqalinersiaqarneq pillugu Inatsisartut inatsisaata allanngortinneqarnera atuutilerpoq, pilersuisussaaqatigiinneq pillugu malittarisassat atorunnaarsinneqarlutik. Pilersuisussaaqatigiinneq isumaginninnermi pisinnaatitaaffinni tunngaviusumik periusaasoq isumaqarpoq, pisortanit pilersorneqarneq pitinnagu, aapparisamit inooqatigisamilluunniit pilersorneqartariaqarneq. Pilersuisussaaqatigiinnerup illuatungeraa inuttut nammineq isertitanut pisinnaatitaaffeqaannginneq, tamannalu aappariinnermi oqimaatigiinnginnermik pilersitsisinnaavoq, illuatungeriit assigiinngitsunik isertitaqarmata. Taamaalilluni aapparisap inooqataasulluunniit isertitaqarnera pissutigalugu, aapparisap inooqataasulluunniit nammineq isertitani annaasinnaavai. Malittarisassat nutaat atuutilerneranni utoqqalinersiallit namminneq isertitaminnut, aapparisamut inooqatigisamulluunniit attuumassuteqaanngitsunik, pisinnaatitaaffeqalerput.

Malittarisassat ilaat atorunnaarsinneqartoq, tassaavoq § 5, imm. 2.

§ 5, imm. 2 malillugu utoqqalinersiallit, utoqqalinersiaqarsinnaatitaanngitsumik aappaqarlutik inuusut, aappariit utoqqalinersiat ilanngunnagit ukiumut kr. 300.000-t inorlugit isertitaqarpata, utoqqalinersiallittut kisermaatut isigalugit tapeqartinneqarsinnaaapput.

Aalajangersakkap isumarivaa aappariit, aappaa isertitakippat aappaalu utoqqalinersiaqarluni, qulakkiissallugit.

Malittarisassaq ulloq 1. januar 2024 atorunnaarsinneqarpoq, utoqqalinersiallit tamarmik pilersuisussaaqatigiinermik malittarisassanut ilanngutitinnginnissaat qulakkeerniarlugu. Tamanna isumaqarpoq, utoqqalinersiallittut aappaqartumut kisermaatut tapeqarsinnaajunnaarnermik.

Malittarisassat atuutilernerisa kingorna paasinarsivoq, malittarisassamik § 5, imm. 2-mik atorunnaarsitsineq isumaqalertoq, aappariinni isertitakitsuni utoqqalinersiallit ilaat isertitamik ilaannik pingaaruteqartunik annaasaqartut, utoqqalinersianut tapinut tunngatillugu kisermaatut isigineqarnermiit utoqqalinersiallittut aappaqartutut isigineqarnermut nuunneqaramik, utoqqalinersianut tapinik appasinnerusunik tunineqartaleralutik. Tamanna inuit isertitakinnerit utoqqalinersianik annikinnerusumik tunineqartalernissaat Naalakkersuisut siunertarinngisaannarpaat.

Peqatigalugu paasinarsivoq, utoqqalinersialinnut eqimattamut mikisumut § 5, imm. 2-p atorunnaarsinneqarnerani aningaasaqarnikkut iluanaarutaasoq. Pisortanit ikiorsiissutinut amerlasuunut ataatsimoortumik atuuppoq, tiguisartut saniatigut isertitaqarnissaq pisinnaatitaaffiusoq, kisianni isertitat aalajangersimasut qaangerneqarpata tunniunneqartat appariartuaartinneqassallutik. Tamatumunnga aamma § 5, imm. 2-mi utoqqalinersianut tapeq ilaatinneqarpoq. Eqimattamut mikisumut isumaqarpoq, pilersuisussaaqatigiinnerup atorunnaarsinneqarnerata kingorna, utoqqalinersianut tapeq ima appariartuaartinneqartigisoq, allaat utoqqalinersianut tapeq tiguisartagaat utoqqalinersialinnut aappaqartunut malittarisassat nalinginnaasut malillugit utoqqalinersianut tapermik tiguisartuniit appasinnerullutik. Taamaattumik tapeq pitsaanerpaamik iluarsiniarlugu eqqarsaqittoqarnissaa pisariaqarpoq.

Tamanna piaarnerpaamik iluarsiniarlugu Naalakkersuisut januar 2024-mi Inatsisartut Aningaasaqarnermut Akileraartarnermullu Ataatsimiititaliaat 2024-mut aningaasanut inatsimmi oqaasertaliussamik immikkut ittumik akuersissuteqaqqullugit qinnuigaat. Maannamut utoqqalinersialinnut, siusinnerusukkat § 5, imm. 2-mut ilaatinneqartunut, utoqqalinersianut tapermik kommunit tunniussinissaasa ingerlatiinnarnissaanut tamanna utaqqiisaasumik tunngaviuvoq. Ilassutitut aningaasaliissutitigut periarfissaqarpoq utoqqalinersialinnut tapimik tunniussinissamut inatsisitigut tunngavissamik pisariaqartumik suliaqarnissaq. Taamaaliornikkut upernaamut naalakkersuinikkut ataatsimiinnermi inatsisitigut tunngavissap suliarineqarnissaa pillugu utoqqalinersiallit qaammatini arlalinni utaqqinissaat pinngitsoortinneqarpoq.

Taamaattoq sullissisunut innuttaasunullu, utoqqalinersialinnut pisinnaatitaaffiit Inatsisartut inatsisaanni aamma ilassutitut aningaasaliissutinut inatsimmi allaqqanissaat naleqqutinngilaq paasiuminartuunaniluunniit. Peqatigalugu utoqqalinersianut tapermut tunngatillugu eqqarsaqittoqarnissaa pisariaqarpoq, aamma aaqqiissummik ataavartussamik suliaqarluni, pilersuisussaaqatigiinnerup atorunnaarsinneqarneranut utoqqalinersianut tapeq pitsaanerpaamik naleqqussarneqarnissaa qulakkeerniarlugu, peqatigalugulu innuttaasut ajornannginnerusumik paasitinnissaannut aamma kommunit pisariinnerusumik aqutsinissaannut ukkataqarnissaq.

Taamaattumik Naalakkersuisut matumuuna utoqqalinersianut tapermik kisermaatut pisinnaatitaaffik, utoqqalinersialinnut utoqqalinersiaqarsinnaatitaanngitsumik aappaqarlutik inooqateqartunut aamma katillugit kr. 300.000-t inorlugit isertitaqartunut, atuutilersitseqqinnissaa pillugu siunnersuummik saqqummiussipput.

## **2. Siunnersuummi immikkoortut pingaarnertit**

Siunnersuutikkut utoqqalinersialinnut utoqqalinersiaqarsinnaatitaanngitsumik aappaqarlutik inooqatilinnut aamma aappariit katillugit kr. 300.000-t inorlugit isertitaqarpata, utoqqalinersianut tapermik kisermaatut pisinnaatitaaffik atuutilerseqqinneqassaaq.

Utoqqalinersiaqarneq pillugu Inatsisartut inatsisaata aamma siusinaartumik pensionisiat pillugit Inatsisartut inatsisaata allanngortinneqarneri pillugit Inatsisartut inatsisaatigut nr. 70, 20. november 2023-meersukkut (Utoqqalinersialinnut siusinaartumillu pensionisialinnut pensioninik naatsorsuinermi pilersuisussaaqatigiinnerup atorunnaarsinneqarnera) aalajangersagaq atorunnaarsinneqarpoq.

§ 5, imm. 2, 1. januar 2024 aallarnerfigalugu atorunnaarsinneqarpoq, kisianni 2024-mut ilassutitut aningaasaliissutitut inatsimmi oqaasertaliussatut 1. februar 2024 aallarnerfigalugu tapermik pisinnaatitaaneq atuutilerseqqinneqarluni. Siunnersuutikkut tapermik iluarsisamik pisinnaatitaaffik Inatsisartut inatsisaannut allanneqassaaq, pilersuisussaaqatigiinnerup atorunnaarsinneqarnera sillimaffigalugu, aamma aqunneqarnissaa pisarinnerulersillugu. Peqatigalugu utoqqalinersianut tapermik pisinnaatitaaffik 2024-mut aningaasanut inatsimmiit peerneqassaaq.

Utoqqalinersiaqarneq toqqammaviumik aningaasartaqarpoq aamma utoqqalinersianut tapeqarluni, kiisalu immikkut tapeqarsinnaalluni. Toqqammaviumik aningaasartat utoqqalinersialinnut tamanut assingiipput, utoqqalinersianullu tapeq utoqqalinersialinnut kisermaanut aamma utoqqalinersialinnut aappaqartunut assigiinngitsuulluni.

2024-mi akigititit ima isikkoqarput:

	Ukiumut	Qaammammut
Toqqammaviumik aningaasartat	78.507 kr.	6.542,24 kr.
Utoqqalinersianut tapeq, kisermaa	85.642 kr.	7.136,83 kr.
Utoqqalinersianut tapeq, aappaqartoq	47.604 kr.	3.967 kr.

Malittarisassat maanna atuuttut malillugit § 5, imm. 2-mi utoqqalinersianut tapeq utoqqalinersiallip aappaatalu isertitaanit toqqammavigineqartunit 51 procentimik, kr. 183.000-nik ilanngaaserlugit, annikillisinneqassapput.

Malittarisassani nutaani annikillitsitsineq pineqartunut kisermaatut inuusunut assigiinnassavaa. Taamaalilluni utoqqalinersianut tapeq taamaallaat 35 %-imik annikillisinneqassaaq, taamaattoq kr. 160.368-inik ilanngaaserlugu. (2024-mi kisitsisit)

Utoqqalinersialinnut kisermaanut malittarisassat assingi atorlugit utoqqalinersianut tapeq annikillisinneqarmat, utoqqalinersianut tapeq taamaallaat nammineq isertitaqarnermi annikillisinneqassaaq. Tapeq aappaasup isertitai tunngavigalugit appariartuaartinneqassanngilaq. Taamaattoq appariit katillugit kr. 300.000-t qaangerlugit isertitaqarpata tapeq tamarmi atorunnaarsinneqassaaq.

Tamanna pissusiviumik isumaqarpoq, appariit utoqqalinersiat ilanngunnagit katillugit kr. 300.000-t inorlugit isertitaqarpata aamma utoqqalinersialik nammineq utoqqalinersiaata

saniatigut kr. 160.368-it inorlugit isertitaqarpat, utoqqalinersialik tamakkiisumik tapeqartinneqassasoq. Utoqqalinersialik, utoqqalinersiat saniatigut allanik isertitaqanngitsoq pineqartoq utoqqalinersiaqanngitsumik aappaarluni inuusoq, ukiumut kr. 300.000-t inorlugit isertitaqarpat, utoqqalinersianut tapermik tamakkiisumik tunineqarsinnaavoq. Utoqqalinersialik, utoqqalinersiami saniatigut nammineq isertitaqartoq, kr. 160.368-it angullugit isertitaqarsinnaavoq appariartuaartinnissaat pitinnagit.

Appariartuaartitsinermut iluseq nutaaq utoqqalinersialinnut, utoqqalinersiaasa saniatigut nammineq isertitaqartunut, taamaallaat sunniuteqassaaq.

Tapermik pisinnaatitaanermut aappariit katillugit kr. 300.000-t inorlugit isertitaqassapput. Utoqqalinersiallip aappaata isertitai tunngavigalugit tapeq appariartuaartinneqarunnaarmat, tamatuma kingunerissavaa, utoqqalinersiallip utoqqalinersianut tapermik kisermaanut tunniunneqartartoq pisinnaatitaaffigiunnaassaa, akerlianillu aappariit kr. 300.000-t qaangerlugit isertitaqarpata aappaqartutut utoqqalinersianut tapeqalissalluni.

Assersuut 1: Utoqqalinersialik utoqqalinersiaqanngitsumik aappaqarpoq. Utoqqalinersialik utoqqalinersiami saniatigut kr. 0-inik isertitaqarpoq. Aappaa ukiumut kr. 295.000-nik akissarsiaqarpoq. Utoqqalinersialik ukiumut kr. 85.642-nik utoqqalinersianut tapeqartinneqassaaq (qaammammut kr. 7137-t)

Assersuut 2: Utoqqalinersialik utoqqalinersiaqanngitsumik aappaqarpoq. Utoqqalinersialik utoqqalinersiami saniatigut kr. 0-inik isertitaqarpoq. Aappaa ukiumut kr. 305.000-nik akissarsiaqarpoq. Utoqqalinersialik ukiumut kr. 47.604-nik utoqqalinersianut tapeqartinneqassaaq (qaammammut kr. 3976-it)

### ***Atuutilersitsineq***

Siunnersuutip matuma 2024-mi ilassutitut aningaasaliissutitut inatsimmi oqaasertaliussaq taarsissavaa. Taamaattumik tunngavimmik nuussineq saqqummiunneqarfiani sunniuteqalernissaa naapertuunnerpaatut isigineqarpoq, taamaalilluni piffissami Inatsisartut inatsisaannik saqqummiunneqarfianiit atuutilerneranut tunngavik pillugu nalornilertoqassanngimmat.

## **3. Pisortanut aningaasaqarnikkut allaffissornikkullu kingunerisassai**

### ***3.1 Aningaasaqarnikkut kingunerisassai***

Siunnersuut ukiumut kr. 3.195.000-t missaannik Nunatta Karsianut katillugit akeqassasoq naatsorsuutigineqarpoq.

Januar 2024-mi utoqqalinersiallit 263-it utoqqalinersiaqarsinnaatitaanngitsumik aappaqartut, aappariit ukiumut katillugit kr. 300.000-t inorlugit isertitaqarput.

Utoqqalinersiallit, aappariit ukiumut katillugit kr. 160.368-it inorlugit isertitaqartut, assigiinngissuteqarnermik misigisaqarnaviangillat.

Utoqqalinersiallit siunnersuummit matumanga marlunnik kalluarneqartussaapput:

- 1) Utoqqalinersianut tapeq aappaata isertitai pissutigalugit appariartuaartinneqartarunnaassaaq
- 2) Utoqqalinersianut tapeq appariartuaartitsinermit iluseq nutaamit sunnerneqassapput

Immikkoortoq 1 – Aappaata isertitai tunngavigalugit appariartuaartitsisoqassanngilaq  
Utoqqalinersiallit 263-iniit siunnersuummi matumani ilaatinneqartuni, ullumikkut 96-it aappaata isertitai tunngavigalugit annikillisititsisoqartarpoq. Taakkunannga 79-it tamakkiisumik tapeqartitsinermit nuunneqassapput, siunnersuutip kingorna taamaallaat nammineq isertitai tunngavigalugit appariartuaartitsisoqartalissamat. Sinneruttut 2023-mut tiguisarnerannut sanilliullugit qaffasinnerusumik tapeqartinneqalissapput.

Maannakkumut malittarisassat atuuttut malillugit tapeqartitsineq appariartuaartinneqartarpoq, aappariit kr. 183.000-t qaangerlugit isertitaqarpat. Tigussaasumik tamanna isumaqarpoq, utoqqalinersiallit, aappaa kr. 183.000-t sinnerlugit isertitaqarpat, siunnersuut aqqutigalugu aningaasaqarnikkut iluanaaruteqassapput.

Aningaasaqarnikkut iluanaarutaasut qanoq annertutiginnissaat nikerartussaavoq. Utoqqalinersiallit aappaata kr. 300.000-nut qanittumik isertitaqarpat, utoqqalinersiallilu utoqqalinersiat saniatigut allamik isertitaqarnani, qaammammut kr. 3170-inik amerlanerusunik tunineqartassaaq.

Immikkoortoq 2 – appariartuaartitsinermit iluseq allanngorlugu

Naliliiffigineqarpoq, utoqqalinersiallit 10-15 missaaniittut siunnersuummi matumanga ilaatinneqartut, kr. 160.368-it, kisermaanut tapeqarnissamut ilanngaattitit killigititaasoq, sinnerlugit namminneq isertitaqartut.

Utoqqalinersiallit, kr. 160.368-it aamma kr. 183.000-t akornanni nammineq isertitaqartut siunnersuut manna aqqutigalugu 2023-mi qaammammut tiguisarnerannut sanilliullugu kr. 14-iniit kr. 256-inut appasinnerusumik tiguisalissapput. Ilimagineqarpoq utoqqalinersiallit tallimat qulillu akornanni pineqartut.

Utoqqalinersiallit kr. 183.000-t aamma kr. 300.000-t akornanni nammineq isertitaqartut qaffasinnerusumik tiguisassapput, 2023 tiguisartakkaminnut sanilliullugu kr. 1100-it angullugit qaffasinnerusumik. Ilimagineqarpoq, utoqqalinersiallit tallimat inorlugit pineqartut.

Inuit taama ikitsigisut pineqarmata, pingaarnertut aningaasartuutitut sunniuteqassanngitsutut allanngineq manna naliliiffigineqarpoq.

### **3.2 Allaffissornikkut kingunerisassai**

Siunnersuummi utoqqalinersianut tapermik naatsorsuineq aamma tunniussineq pillugit aqutsineq ilitersuinerlu kommuninut ajornannginnerulissasoq naatsorsuutigineqarpoq, utoqqalinersialinnut utoqqalinersiaqanngitsumik aappaqartunut immikkut ittumik utoqqalinersianut tapeq aamma utoqqalinersialinnut kisermaat pillugit malittarisassat assingiilissammata.

### **4. Inuussutissarsiortunut aningaasaqarnikkut allaffissornikkullu kingunerisassai**

Siunnersuut inuussutissarsiortunut aningaasaqarnikkut allaffissornikkullu kingunerisassaanik soqanngilaq.

### **5. Avatangiisinut, pinngortitamut inuillu peqqissusaannut kingunerisassai**

Siunnersuut avatangiisinut, pinngortitamut inuillu peqqissusaannut kingunerisassaanik soqanngilaq.

### **6. Innuttaasunut kingunerisassai**

Siunnersuut utoqqalinersiallit ilaannut aningaasaqarnikkut iluanaaruteqartitsissaaq, aamma utoqqalinersiallit ilaannut ikitsuaqqanut aningaasaqarnikkut ajoqutaassalluni.

### **7. Allanut pingaarutilinnut kingunerisassai**

Siunnersuut allanut pingaarutilinnut kingunerisassaanik soqanngilaq.

### **8. Tusarniaaneq**

Siunnersuummik kommunit isumaginninnermik ingerlatsivii kiisalu KIMIK iT, kommunit utoqqalinersianik tunniussisarnermut suliassanik suliarinnittarnermut aqqissuussaanik ineriartortitsisoq ingerlatsisorlu, suliaqarnermut ingerlaavartumik ilaatinneqarput. Tamatuma saniatigut Aningaasaqarnermut Akileraartarnermullu Naalakkersuisoqarfik suliap ingerlanerani immersueqataavoq.

## **Siunnersuummi malittarisassanut ataasiakkaanut oqaaseqaatit**

### *§ 1-imut*

Aalajangersakkap aalajangersarpaa utoqqalinersiallit, utoqqalinersiaqarsinnaatitaanngitsumik appaartut aamma utoqqalinersiallip aappaatalu ukiumut katillugit isertitaat kr. 300.000-t inorlugit annertussuseqarpata, utoqqalinersialik kisermaatut isigineqassasoq. Tamanna pissaaq utoqqalinersialik utoqqalinersianut tapermik kisermaatut akigititap annertoqataanik tunineqarneratigut.

Kr. 300.000-t naatsorsorneqarneranni Inunnut Isumaginninnikkut Isumannaallisaaneq pillugu Nunat Avannarliit isumaqatigiissutaat malillugu utoqqalinersiat aamma pensionisiaqartoqarpat ilanngunnagit isertitat pineqarput.

Aalajangersakkamut ilanngutitinneqarniaraanni

- 1) Utoqqalinersialik katissimallugu aappaqassaaq imaluunniit utoqqalinersiaqarsinnaatitaanngitsumik inooqateqarluni aamma
- 2) Aappariit kr. 300.000-t inorlugit isertitaqassapput, aappaasup isertitai ilanngullugit, kisianni utoqqalinersiat ilanngunnagit, naatsorsorneqarpata.

Utoqqalinersianut tapeqartitsinermi kisermaanut akigititaq malinneqassaaq, aamma kisermaanut akigititamut assinganik ilanngaateqarluni annikillisititsinermilu procentia annertoqatigalugu.

### *§ 2-mut*

Imm. 1-imut

Siunnersuutigineqarpoq, Inatsisartut inatsisaat ulloq saqqummiunneqarfiata aqaguani atuutilersinneqassasoq. Siunnersuutip saqqummiunneqarnerata kingorna utoqqalinersialinnut utoqqalinersianik qaammatip tulliani tunniussinermut siullermeertumik siunnersuut sunniuteqassaaq, taamaalilluni tapeq Inatsisartut inatsisaat manna malillugu tunniunneqarluni aamma ilassutitut aningaasaliissutinut inatsimmi oqaasertaliussaq malinneqarunnaarluni.

Imm. 2-mut

Inatsisartut inatsisaat manna atuutilernera peqatigalugu 2024-mut aningaasanut inatsimmi oqaasertaliussaq kontumut pingaarnermut 31.03.08 Utoqqalinersiat, Inatsisartut Aningaasaqarnermut Akileraartarnermullu Ataatsimiititaliaannit ulloq 16. januar 2024 akuersissutigineqartoq, atorunnaarsinneqarpoq.

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertai atuuttut</i>	<i>Inatsisissatut siunnersuut</i>
	<p><b>§ 1</b></p> <p><i>Utoqqalinersiaqarneq pillugu Inatsisartut inatsisaanni, tak. Namminersorlutik Oqartussat inatsimmik nalunaarutaat nr. 10, 24. marts 2023-meersoq, Inatsisartut inatsisaat nr. 36, 13. juni 2023-meersup aamma Inatsisartut inatsisaat nr. 70, 20. november 2023-meersup malitsigisaanik allanngortinneqartoq, tulliuttut allannguutigineqassapput:</i></p>
<p><b>§ 5.</b> Inatsisartut inatsisaanni matumani aapparisaq naatsorsuunneqartoq tassaavoq utoqqalinersiallip katissimallugu aapparisaq, nalunaarsukkamik aapparisaq, imaluunniit katissimanermut assingusumik sivikinnerpaamik ukiumi ataatsimi aapparisimasaa.</p> <p><i>Imm. 2.</i> Aappaasoq isumaginninnerup iluani ulloq unnuarlu angerlarsimaffimmut aalangajersimasumik najugalittut nuuppat, utoqqalinersiaqartoq kisimiittutut isigineqassaaq.</p>	<p><b>1.</b> Nutaatut § 5, imm. 2, ikkunneqassaaq: ” <i>Imm. 2.</i> Utoqqalinersiallit utoqqalinersiaqarsinnaatitaanngitsumik aappaarlutik inuusut, utoqqalinersianut tapisiaqartinneqassapput utoqqalinersialimmut kisermaamut tunniunneqartut annertoqataannik, tak. § 10, imm. 1, utoqqalinersialik aappaalu ukiumut katillugit kr. 300.000-t inorlugit, Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu utoqqalinersiat pensionisiallu ilanngunnagit, isertitaqartarpata. Utoqqalinersianut tapeq utoqqalinersialinnut kisermaanut malittarisassat malillugit appariartuaartinneqassaaq, tak. §§ 10, imm. 2 aamma imm. 3.”</p> <p><i>Imm. 2 tamatuma kingorna imm. 3-nngussaaq.</i></p>
	<p><b>§ 2</b></p> <p>Inatsisartut inatsisaat ulloq saqqummiunneqarfiata aqaguani Inatsisartut inatsisaat atuutilissaaq aamma qaammatip tulliani utoqqalinersianik tunniussinnermut siullermeertumik sunniuteqassalluni.</p>



	<p><i>Imm. 2. Peqatigalugu 2024-mut anigaasanut inatsimmi oqaasertaliussaq, kontumut pingaarnermut 31.03.08 Utoqqalinersiat, Inatsisartut Aningaasaqarnermut Akileraartarnermullu Ataatsimiititaliaannit ulloq 16. januar 2024 akuersissutigineqartoq, atorunnaarsinneqarpoq.</i></p>
--	---